

I. DISPOSICIÓN XERAIS

MINISTERIO DE AGRICULTURA, PESCA E ALIMENTACIÓN

5732 *Orde APA/441/2019, do 9 de abril, pola que se modifica a Orde AAA/2536/2015, do 30 de novembro, pola que se regulan as artes e modalidades de pesca marítima e se establece un plan de xestión para os buques dos censos do caladoiro nacional canario.*

O Regulamento (UE) n.º 1380/2013 do Parlamento e do Consello, do 11 de decembro de 2013, sobre a política pesqueira común, ten como obxectivo fundamental garantir unha explotación sustentable dos recursos pesqueiros vivos e da acuicultura no marco dun desenvolvemento sustentable, tendo en conta de maneira equilibrada os aspectos económicos, ambientais e sociais.

En particular, o artigo 7 regula os tipos de medidas que se poderán levar a cabo, entre os cales figuran o establecemento de obxectivos para a conservación e explotación sustentable das poboacións e as medidas conexas necesarias para minimizar a repercusión da pesca no medio mariño, tamaños mínimos de referencia para efectos de conservación, regulación das características das artes de pesca e normas relativas á súa utilización, de limitacións ou prohibicións na utilización de determinadas artes de pesca e nas actividades de pesca, en determinadas zonas ou períodos, así como a obriga de que buques pesqueiros deixen de faenar nunha zona determinada durante un período mínimo establecido.

Pola súa parte, a Lei 3/2001, do 26 de marzo, de pesca marítima do Estado, establece entre os seus fins os de velar pola explotación equilibrada e responsable dos recursos pesqueiros e, así, establece no seu artigo 8 que o titular do departamento poderá adoptar medidas de regulación do esforzo pesqueiro, entre as cales se encontra a limitación do tempo de actividade pesqueira. Así mesmo, a referida lei establece no seu artigo 12 que, co obxecto de protexer, conservar e recuperar os recursos pesqueiros e logo de informe do Instituto Español de Oceanografía, o titular do departamento poderá establecer fondos mínimos, zonas ou períodos de veda, nos cales se limite ou se prohíba o exercicio das actividades pesqueiras ou a captura de determinadas especies, así como adoptar aquelas outras medidas que se consideren necesarias.

En 2015 publicouse a Orde AAA/2536/2015, do 30 de novembro, pola que se regulan as artes e modalidades de pesca marítima e se establece un plan de xestión para os buques dos censos do caladoiro nacional canario, que viña unificar nunha soa norma a dispersa normativa para a actividade en augas do arquipélago canario. En concreto, a citada orde substituíu e derogaba as seguintes ordes: Orde AAA/948/2013, do 22 de maio; Orde APA/677/2004, do 5 de marzo; Orde APA/2586/2002, do 11 de outubro; Orde do 26 de marzo de 1998; Orde do 20 de xaneiro de 1995 e a Orde do 4 de febreiro de 1987, que contiñan as normas de aplicación para distintas artes de pesca no caladoiro canario.

Ao longo destes tres anos transcorridos detectáronse diversas carencias na norma que convén corrixir, ao tempo que xurdiu nova información sobre o uso tradicional das nasas que suxire a posibilidade de adaptar a norma actual.

En concreto, a norma actual deixa fóra algunhas das artes de cerco que son habitualmente utilizadas pola frota canaria e que deben ser definidas e incluídas para garantir que non hai erros de interpretación en canto ás dimensións e especies a que van dirixidas.

No que respecta ao uso do *jigging* e dos depresores no corricán, a normativa é distinta en augas interiores e en augas exteriores, polo que convén harmonizala para que exista coherencia entre ambos os tipos de augas. En augas interiores e no resto da normativa española, respecto á pesca de recreo non existe limitación a ambos os tipos de actividade

que, por outro lado, son selectivos para a captura de peixes maiores e evitan a captura de crías e de peixes de pequeno tamaño. Por iso, suprimense as alíneas b) e c) do artigo 4 da Orde AAA/2536/2015, do 30 de novembro, sobre prohibicións.

Polo que se refire ás artes de trampa, introdúcese un novo artigo 4 bis, que responde á necesidade de regular o balizamento das artes menores e artes de trampa por dentro das 12 millas, conforme o estipulado nos artigos 13 a 17 do Regulamento (UE) n.º 404/2011 da Comisión, do 8 de abril de 2011, que establece as normas de desenvolvemento do Regulamento (CE) n.º 1224/2009 polo que se establece un réxime comunitario de control para garantir o cumprimento das normas da política pesqueira común.

Por outro lado, ao longo destes tres anos transcorridos desde a aprobación da norma elaboráronse estudos que demostran que esta arte produce un impacto menor do estimado. En concreto, hai que destacar o proxecto «Nasa sustentable: estudo sobre o impacto das nasas para peixes e melloras técnicas correctoras», elaborado entre os anos 2016 e 2017, que se une aos traballos proxecto Nasa 75 de 2009 e o proxecto Nasa 75 inverno de 2012.

Débese, pois, adaptar o estipulado na sección 4ª sobre artes de trampa tal e como prevé o punto 3 do artigo 11 da orde, que permite a revisión das características técnicas e do número de nasas á luz dos citados traballos unha vez que estes sexan revisados polo Instituto Español de Oceanografía.

Parece moito máis coherente que a limitación en canto ao número máximo de nasas estea vinculada á superficie da plataforma continental arredor de cada illa que ao número de buques, co que se debe permitir que, dentro da elaboración de plans de pesca como o que xa contén a norma actual para as augas exteriores, se poida fixar un número maior de nasas que na norma xeral, sempre que se respecten uns límites globais de esforzo.

No que concirne ao uso da arte de enmalle coñecida como volanta, débense axustar as súas medidas para adaptala ao uso e tradición e maior rendemento pesqueiro, e modificar ao mesmo tempo algunhas das coordenadas das zonas onde se autorizan, en especial a correspondente a Arguineguín, e o período de tempo en que esta actividade non se poderá exercer.

En canto ao palangre de fondo, a medida de limitación do número de anzois a 500 tiña como obxecto protexer a plataforma das illas do uso desta arte para evitar a competencia coas artes tradicionais de nasas e liñas de man. Porén, o caladoiro insular combina esta plataforma no contorno das illas con caladoiros máis afastados das illas ou de augas máis profundas onde non existe competencia coa frota local e porén, si hai unha concorrencia con frota doutras partes da Península ou de Portugal. Estes barcos, con plenas posibilidades de acceso a esas augas, operan con palangres armados con ata 3500 anzois, o que se supón unha competencia coas unidades insulares dedicadas ao palangre de fondo.

Convén, pois, modificar o articulado relativo a esta modalidade para adaptar o número máximo de anzois que poderán ser usados nesas zonas afastadas da plataforma inmediata ás illas ou en rangos batimétricos onde non se produza unha interferencia coas artes tradicionais. Nesas zonas, o número de anzois débese aumentar para achegalos aos que dispoñen as frota nacionais que operan en augas próximas ao arquipélago ata os 2.500 anzois. Para as augas no contorno inmediato das illas e ata unha profundidade de 200 metros, seguirá rexendo a limitación a 500 anzois como máximo.

Efectuouse o trámite de comunicación á Comisión Europea previsto no artigo 46 do Regulamento (CE) n.º 850/1998 do Consello, do 30 de marzo de 1998, para a conservación dos recursos pesqueiros a través de medidas técnicas de protección das crías de organismos mariños.

O contido de esta orde axústase aos principios recollidos no artigo 129 da Lei 39/2015, do 1 de outubro. Así, de acordo cos principios de necesidade e eficacia, xustifícase esta norma na necesidade de adecuar a vixente normativa á procedemental, e de simplificar os procedementos; do mesmo modo, adécuaase ao principio de proporcionalidade, pois non existe outra alternativa menos restritiva de dereitos ou que impoña menos obrigacións aos

destinatarios. En canto aos principios de seguridade xurídica, transparencia e eficiencia, a dita norma adécuase a estes, pois é coherente co resto do ordenamento xurídico, e procurouse a participación das partes interesadas, evitando cargas administrativas innecesarias ou accesorias.

A elaboración desta orde someteuse a audiencia e información públicas conforme o disposto no artigo 26.6 da Lei 50/1997, do 27 de novembro, do Goberno. Así mesmo, someteuse a consulta das entidades representativas dos sectores afectados e tamén foron consultados a Comunidade Autónoma de Canarias e o Instituto Español de Oceanografía.

Na súa virtude, coa aprobación previa da ministra de Política Territorial e Función Pública, de acordo co Consello de Estado, dispoño:

Artigo único. *Modificación da Orde AAA/2536/2015, do 30 de novembro, pola que se regulan as artes e modalidades de pesca marítima e se establece un plan de xestión para os buques dos censos do caladoiro nacional canario.*

A Orde AAA/2536/2015, do 30 de novembro, pola que se regulan as artes e modalidades de pesca marítima e se establece un plan de xestión para os buques dos censos do caladoiro nacional canario, queda modificada como segue:

Un. Modifícase a letra a) do número 1 do artigo 3, que queda redactada como segue:

«a) Artes menores, que incluírán as seguintes artes de pesca: aparellos de anzol (liña de man, liña ou amaño para pesca do alto, cana, *puyón*, palangre de fondo, *corricán* ou *corrica*), artes de trampa (nasas e tambor para moreas), artes de izada (*pandorga*, *gueldera* ou *tarralla*), artes de enmalle (trasmallo e volanta), artes de cerco (sardiñal ou traíña, chinchorro de aire ou hamaca e *salemera*) e vara de peto.

O uso de artes menores será polivalente para as embarcacións incluídas no censo de artes menores, polo que se poderán levar a bordo simultaneamente e se poderá exercer a actividade con varias artes ou aparellos dos autorizados nesta orde. As embarcacións cunha eslora total maior de 15 metros terán unha limitación á utilización simultánea das artes de cerco, canas, liñas para túnidos e palangre, só poderán levar a bordo un destes tipos de artes e/ou aparellos ao día, excepto cando capturen cebo vivo para a captura de túnidos, para o cal poderán levar a bordo simultaneamente canas e arte de cerco. O titular da embarcación deberá comunicar previamente á Área Funcional de Agricultura e Pesca da Delegación do Goberno en Canarias a arte de pesca que se vaia utilizar, a cal poderá levar a cabo as posteriores comprobacións que se consideren necesarias.»

Dous. Substitúese o artigo 4 polo seguinte:

«Artigo 4. *Prohibicións no exercicio da pesca no caladoiro nacional de Canarias.*

Prohíbese calquera forma de pesca de arrastre, tanto se se realiza con arte remolcada por embarcación como se se efectúa sen embarcación desde a beira.»

Tres. Engádese un artigo 4 bis, balizamento de artes menores e artes de trampa, que queda redactado como segue:

«Artigo 4 bis. *Balizamento de artes menores e artes de trampa.*

O balizamento das artes menores e artes de trampa por dentro das 12 millas efectuarase conforme o estipulado nos artigos 13 a 17 do Regulamento (UE) n.º 404/2011 da Comisión, do 8 de abril de 2011, que establece as normas de desenvolvemento do Regulamento (CE) n.º 1224/2009 polo que se establece un réxime comunitario de control para garantir o cumprimento das normas da política pesqueira común, ou mediante calquera outro sistema equivalente que permita o control das artes.»

Catro. Modifícase a letra a) do artigo 5, que queda redactada como segue:

«a) De regulación rexional: as súas características e normas de uso serán as mesmas en todo o caladoiro. Inclúense todos os aparellos de anzol (liña, amaño para pesca do alto, cana, corrica, palangre de fondo e *puyón*), as artes de cerco (cerco, chinchorro, *salemera*, traíña e sardiñal) e as artes de izada (*pandorga*, *gueldera* ou *tarralla*).»

Cinco. Modifícase a alínea b) e engádense as seguintes alíneas ao artigo 8:

«b) Chinchorro de aire ou hamaca: terá unha luz de malla mínima de 10 milímetros. As súas dimensións máximas serán de 125 metros de alas, 18 metros de copo e unha altura máxima de 100 metros. Excepcionalmente poderá usarse unha luz de malla mínima de 8 milímetros para captura de peixe rei (*Atherina presbyter*) e bocareu ou bocarte (*Engraulis encrasicolus*).»

«d) Cerco de altura: terá unha luz de malla de 14 mm. As súas dimensións máximas serán de 450 metros con alas, incluído o copo e unha altura máxima de 100 metros.

e) Traíña para captura de peixe rei e bocarte como cebo vivo. Terá unha malla de 8 mm. As súas dimensións máximas serán de 160 metros de alas incluído o copo e unha altura máxima de 50 metros. Esta arte tan só se poderá utilizar para a captura das especies:

- 1.^a Peixe rei (*Atherina presbyter*)
- 2.^a Bocareu ou bocarte (*Engraulis encrasicolus*).»

Seis. Modifícase o número 4 do artigo 10, que queda redactado como segue:

«4. Só se permite o uso de cebo morto, como carnada e *engodo*, nos seguintes aparellos e artes:

- a) Canas.
- b) Liñas.
- c) Corrica.
- d) Nasas.
- e) Palangre de fondo.
- f) *Gueldera*.
- h) Tambor para moreas.»

Sete. Modifícase o número 6 do artigo 10, que queda redactado como segue:

«6. A carnada, para o seu uso como cebo vivo e cebo morto e *engodo*, poderase capturar con poteiras, *gueldera*, traíña e chinchorro de aire ou hamaca (peixes), cunha luz de malla como mínimo de 10 mm, salvo as excepcións recollidas no artigo 8 desta orde para a captura de cebo vivo de peixe rei (*Atherina presbyter*) e bocareu ou bocarte (*Engraulis encrasicolus*). O uso das mallas de 8 mm implicará unha captura máxima por día de non máis de 150 quilos entre ambas as especies.»

Oito. Modifícase o número 1 do artigo 11, que queda redactado como segue:

«1. Nasas para peixes: as nasas para peixes terán como máximo 110 centímetros de altura e 390 centímetros de diámetro para as circulares ou de lado no caso de nasas cadradas, ou poden ser encadradas nun cadro de 390 centímetros de lado no caso das poliédricas. A malla será de material degradable e a luz de malla mínima de 50,8 mm para as nasas que sexan iguais ou superiores a 200 cm de diámetro. Ningunha nasa poderá ter unha luz de malla inferior a 31,6 milímetros. As nasas deberán contar con, polo menos, unha porta ou algún compoñente estrutural da nasa de dimensións suficientes para o paso das capturas, unido

mediante un material que se degrade nun período non superior a dous (2) meses e permita a saída do peixe en caso de perda da nasa.

As mallas serán de forma hexagonal de lados iguais e paralelos dous a dous. A abertura da malla medirase segundo o anexo V.

De forma xeral, o número máximo de nasas autorizadas por embarcación será de 30. Non obstante, e dentro dun plan de pesca insular, que deberá ser aprobado mediante resolución da Secretaría Xeral de Pesca, poderase autorizar un número maior por embarcación en función da superficie da plataforma insular. Este plan deberá incluír medidas adicionais de redución de esforzo e de protección das especies máis sensibles e comportar no tempo estudos periódicos do impacto do aumento do número de nasas respecto á norma xeral.

A profundidade mínima para fondear nasas é de 18 metros para todas as nasas de menos de 300 cm de diámetro ou de lado e de 50 metros para o resto de nasas.»

Nove. Modifícase o número 3 do artigo 14, que queda redactado como segue:

«3. Volanta: a dimensión mínima das mallas do pano será de 82 mm. Cada peza terá unha lonxitude máxima de 72 metros e a lonxitude máxima total da arte medida de puño a puño non poderá exceder os 500 metros. O número máximo de pezas permitidas para cada embarcación será de 5 no caso de que se calen de maneira independente.»

Dez. Modifícanse o número 1 e o número 3 do artigo 15, que quedan redactados da forma seguinte:

«1. Illa de Gran Canaria. Só se poderá calar volanta a unha profundidade mínima de 18 metros nas seguintes zonas:

a) Zona de Arguineguín: desde Punta de Maspalomas (27°43' 49" N; 15° 34' 09" W) ata a praia de La Verga (27° 46' 42" N; 15° 42' 48" W), desde o 1 de xaneiro ao 30 de abril.

b) Desde Roque de Gando (28° 03' 11" N) ata Punta Jinámar (28° 01'34" N) desde o 1 de setembro ata o 31 de decembro.

c) Zona de Agaete: desde a baixa de El Negro (28° 05' 18" N; 15° 42' 33" W) ata El Molino (28° 06' 59" N; 15° 42' 48" W), desde o 1 de maio ata o 30 de setembro.»

«3. Illa de La Palma: trasmallo desde o 14 de marzo ata o 14 de outubro en toda a illa salvo na zona de Fuencaliente –desde Punta del Hombre a Punta del Viento– onde queda prohibido durante todo o ano.»

Once. Modifícase o número 1 do artigo 16, que queda redactado como segue:

«1. Nas augas da plataforma arredor das illas ata a isóbata de 200 metros, a lonxitude máxima dos palangres non poderá ser superior a 2.000 metros e o número máximo de anzois pescando de forma simultánea nos palangres non superará os 500.

Para as pesqueiras en augas do noiro de máis de 200 metros de profundidade ou en fondos máis superficiais non vinculados á plataforma inmediata arredor das illas, poderanse armar palangres cunha lonxitude máxima que non poderá ser superior a 7.000 metros e o número máximo de anzois pescando de forma simultánea poderá ser de 2.500 anzois. Nunha mesma marea tan só se poderá realizar a actividade de palangre nunha das dúas zonas mencionadas. As embarcacións que practiquen a pesca de palangre poderán ter a bordo, como máximo, ata o dobre dos anzois permitidos para a zona en que estean traballando, isto é, 1.000 anzois preparados para a súa utilización na plataforma arredor das illas e 5.000 anzois nas zonas do noiro por debaixo de 200 metros ou fondos non vinculados á plataforma no contorno inmediato das illas.»

Doce. Engádese o seguinte anexo.

«ANEXO V

Medición de mallas hexagonais de nasas

Luz da malla hexagonal:

Distancia medida en ángulos rectos entre dous lados trenzados M (véxase a figura 1).




Fig. 1

(M) = luz da malla da nasa

Esta medida deberá ser tomada con flexómetro, medindo a distancia que ocupan 10 mallas consecutivas incluídos os nós, dividir entre 10 e considerar o resultado como a luz da malla (figura 2).




Fig. 2

(D) = dimensión de 10 mallas

Por todo iso, o protocolo é o seguinte:

Medirase a distancia que ocupan 10 mallas consecutivas en calquera parte da arte, excepto nas zonas próximas a aberturas, bocas ou matadoiros de extremos lisos, que permiten a entrada de especies, así como nas zonas próximas á porta para extraer as capturas. De igual modo, ao seleccionar as mallas deberán excluír mallas rotas ou reparadas.

A luz de malla será o resultado de dividir a distancia obtida entre o número de mallas medidas (10).»

Disposición transitoria única. *Período transitorio.*

A adaptación das artes ás novas normas contidas nesta orde poderase realizar nun período de seis meses desde a súa entrada en vigor.

Disposición derradeira única. *Entrada en vigor.*

Esta orde entrará en vigor o día seguinte ao da súa publicación no «Boletín Oficial del Estado».

Madrid, 9 de abril de 2019.—O ministro de Agricultura, Pesca e Alimentación, Luis Planas Puchades.